

## **Innā Lillahi Wa Innā Ilayhi Rāji‘ūn**

**Dengan sedihnya diberitakan, U. Abdul Hamid bin Saad, bekas guru pelawat Parit, Perak, telah kembali ke rahmatullah di tanah suci Makkah al-Mukarramah, pada 6 Zulhijjah 1378 (12 Jun 1959) dalam usia 61 tahun.**

**Almarhum ialah seorang penulis dan pengarang yang terkenal. Banyak makalah-makalahnya yang berharga, mengenai bahasa dan kebudayaan, menghiasi majalah Qalam dan lain-lain majalah dan akhbar di tanah air.**

**Diantara buah kalamnya yang telah dibukukan ialah kamus “Bahasa Sanskrit”, yang diterbitkan oleh Jabatan Persuratan Kesatuan Persekutuan Guru-guru Melayu Semenanjung.**

**Almarhum baharu sahaja bertolak ke Mekah pada bulan Syawal yang lalu.**

**Mudah-mudahan Allah cucuri rahmat dan diilhamkan sabar kepada kaum keluarganya.**

di sebelahnya pada tahun 747 H. “Madrasah Tilmāsan” ini ialah salah sebuah bangunan Islam yang indah sekali di seluruh Afrika Utara, dan masih terdiri dengan teguh hingga hari ini.

### **Qaşbah, Bandar yang Berkota**

Sultan Maulāy Ismā‘īl, Raja Maghribi, yang memerintah pada akhir kurun kesebelas hingga pertengahan kurun yang kedua belas dan bersemayam di bandar Fās, telah berpindah ke sebuah bandar kecil bernama “Miknasah al-Zāytūnah” terletak kira-kira 40 batu di Tenggara bandar Fās. Hawanya yang menyegarkan itu sangat-sangat menarik hati Sultan Ismā‘īl, lalu didirikannya di situ istana-istana besar, dikelilingi oleh tembok yang tinggi dan tebal kukuh. Tempat itu terkenal dengan: Qaşbah. Di tengah-tengah istana-istana yang indah permai itu didirikannya sebuah masjid jamek yang

sentiasa penuh sesak pada tiap-tiap hari Jumaat. Melihatkan masjidnya tidak muat dengan makmum yang bertambah ramai, maka sebuah masjid yang lebih besar dan lebih indah telah didirikan oleh baginda, lalu diberi nama: “al-Masjid al-Akhḍar” (Masjid Hijau). Nama ini, barangkali berpunca dari menaranya yang berwarna hijau itu.

Alam di situ bertambah indah dengan wujudnya sebuah danau yang membiru airnya dan membayangkan pohon-pohon khurma<sup>4</sup> yang menghijau subur di kelilingnya.

Sementara di luar tembok terdiri sebuah bangunan besar yang tersergam dengan hebatnya menjadi tempat kediaman tentera Islam yang gagah berani, cukup lengkap dengan alat senjata dan 1600 ekor kuda Arab yang tangkas dan terlatih.

---

<sup>4</sup> kurma